

## BIOGRAFI

### ANICETO GURO-BERTENI NEVES

Naran badak mak Neves, moris iha Hato-Udo, data 12 fulan Agosto tinan 1973. Remata kursu superior iha Universidade Nasional Timor-Lorosa'e iha tinan 2003 iha Dixiplina Siensiais Governamentais, husi Fakultade Siensiais Sosial no Politiku. Iha Primeiru Graduasaun Universidade Nasional Timor-Lorosa'e nian ne'e, Neves sai nudar graduantes ne'ebe iha valor a'as-liu tebes;

Depois remata Universidade ne'e, Neves sai kedas nudar dosenti iha Fakultade Siensiais Sosial & Politika hanoin dixiplina Lei Direitus Humanus Internasional & Aplikasaun Estudu Paz no Transformasaun Konfliktu. Iha Tinan 2005, Neves sai nudar Dosenti Permanenti ba Departamentu Dezenvolvimentu Komunitariu iha Fakultade Siensiais Sosial no Politiku, Universidade Nasional Timor-Lorosa'e.

Embora nudar akademista ida, Neves mos kuinese nudar ativista senior ba direitus humanus iha Timor-Lorosa'e. Durante tinan barak nia laran servisu hamutuk ho Asosiasaun ba Lei, Direitus Humanus & Justisa "Asosiasaun HAK". Neves gaina esperiensa barak iha area Lei & Direitus Humanus kumesa iha tinan 1997 to'o 2005 hamutuk ho organizasaun ida ne'e. Neves, kuinese nudar akademista ida ne'ebe iha esperiensa, kuinesementu no abilidadi iha area Lei Direitus Humanus Internasional no estudu paz ninian. Kapasidade hirak ne'e dezenvolve liuhusi esperiensa servisu, atende kursu-sira iha nivel nasional, rezional no Internasional iha area refere; Neves iha oportunidade tuir kursu hirak ne'e kumesa iha tinan 1998 to'o agora iha nasaun sira hanesan Estadu Unidus da Amerika (EUA), Australia, Fiji, Thailandia, Indonezia, Cambodia, Philipina, Afrika, nst;

Neves mos iha esperiensa sai nudar lia-nain iha workshop, seminar sira iha Timor-Leste no iha reziaun Aziatiku, nota katak iha:

- Tinan 2002:  
Iha Phnom Penh, Cambodia, sai nudar lia-nain ba Konferensia Rezional Azia nian apresenta papel ho titlu "Konseitu Rekonsiliasaun no Justisa Restorativu iha Reziaun Azia" nian iha konferensia ne'ebe organiza husi Alliance for Conflict Transformation (ACT) Cambodia.
- Tinan 2003:  
Iha Fiji nudar lia-nain iha konferensia ne'ebe organiza husi Komisaun Nasional Direitus Humanus Fiji. Iha konferensia ne'e Neves halo apresentasaun konaba "Politika Lalaok Direitus Humanus ba Reziaun Aziatiku ho estudu kazu konaba Timor-Leste".
- Tinan 2004:  
Iha Brisbane, Australia sai nudar membru Painel Peritus (members expert panel) iha konferensia rezional Azia Pasifiku ne'ebe organiza husi Amnestia Internasional. Iha konferensia ne'e, Neves halo apresentasaun papel rua, *ida*; ho titlu Dezenvolvimentu Enkuandramentu Legal konaba Politika Nasional ba Violensia Domestika, *rua*; ho titlu Analiza Kritikus konaba Politika Nasional Rezolve Kazu Krime Grave-estudu kazu Timor-Leste"

Iha nivel Nasional Timor-Leste, Neves iha esperiensa barak tebes sai nudar lia-nain ba seminariu no Konferensia ne'ebe organiza husi Guvernu Timor-Leste, Universidadi Nasional Timor-Lorosa'e, Misaun ONU iha Timor-Leste iha area Lei Direitus Humanus Internasional, isue sira konaba Rekonsiliasaun & Justisa, no seluk-seluk tan hahu husi tinan 2000 to'o agora. Konaba isue no

topiku hirak ne'e Neves hakerek papel barak tebes no balun publika iha Diariu Nasional iha Timor-Leste no publikasaun alternativu sira seluk.

Tinan 2006-2008:

Neves hola konsentrasaun iha area Transformasaun Konflitu & Hari'i Paz iha Timor-Leste. Neves sai nudar konsultor ba Guvernu Timor-Leste iha Ministeriu Trabalho & Reinsersaun Komunitariu (Guvernaun Fretilin) nian iha prosesu dezenvolve no elaborasaun Politika Nasional hodi responde Krizi Nasional ne'ebe mosu iha Abril 2006.

Enkuantru depois konfrontasaun armas entre membru no Komandante Forsa Defeza Timor-Leste iha Maiu 2006, Neves nomeadu nudar membru ba Komisaun Altu Nivel "KOMISAUN NOTAVEIS" reprezenta Organizasaun Sosiedade Sivil Timor-Leste hodi lidera negosiasaun no inkeritu ba alegasaun pratika diskriminasaun no maus-tratu ne'ebe sai kauza ba konfrontasaun ne'e.

Durante tensaun konfrontasaun lao iha tinan 2006-2008, Neves lidera prosesu negosiasaun ba parte konflitu sira husi instituisaun militar ne'ebe fahe-rua ho motivu lorosae-loromonu. Durante halo negosiasaun, Neves servisu besik no hamutuk ho Representante Estadu Timor-Leste nian Senhor Longuinho Monteiro ne'ebe nudar-mos Prokurador Jeral RDTL, parte seluk ne'ebe lidera husi Major Alfredo Reinado Alves (matebian) no Tenenti Gastao Salsinha). Iha fulan Juini no Juili 2007, Neves hamutuk ho Advogadu sira hato'o "konseitu papel" konaba Rezime Dialogu entre parte konflitu lideransa politiku estadu & komando militar ho parte sira seluk ba Prezidenti da Republika. No koresponde ho konseitu papel ne'e estadu Hari'i Tasforce Dialogu ba parte rua ne'e to'o akontese 11 Feveireiru 2008 ne'ebe rezulta lideransa rebeldes Major Reinado mate.

Hahu iha fulan Maiu 2008, Neves lidera fali prosesu asesmentu no estudu ba konflitu violensia iha nivel Juventude ne'ebe asosiadu ho konflitu violensia lider no elementu organizasaun artes & ritual marsiais. Neves lidera prosesu ne'e hamutuk ho Asosiasaun HAK no estudante Universitariu husi Universidade Nasional Timor-Lorosa'e.

Iha fulan Juili 2008, Neves hamutuk ninia ekipa korsege lori parte rua ne'ebe ativu iha konflitu violensia "PSHT-77" to'o iha meja negosiasaun. No iha 27 Agosto 2008, parte-rua nomea Neves nudar negosiador no mediator prinsipal hodi lidera mediasaun ne'e no korsege lori parte-rua asina AKORDU PAZ nian iha Dili Timor-Leste. Ho asina akordu ne'e, parte-rua hapara kedas konfrontasaun no parte rua lidera insiailu lubun ida hodi rezolve problema sira balun iha sosiedade nia le'et;

Kumesa iha ne'e, Neves hetan konfiansa lubun ida husi lideransa no elementu artes & ritual marsiais sira. Ho nune, iha kazu lubun ida ne'ebe Neves sai nudar fasilitador, negosiador no mediator ba konflitu violensia ne'ebe involve elementu organizasaun artes & ritual marsiais iha Dili no distritu balun. Liuhusi Asosiasaun HAK, Neves halo advokasia barak konaba transformasaun artes & ritual marsiais hodi sai nudar ajenti ba transformasaun konflitu & hari'i paz iha Timor-Leste;

Desde hamutuk ho Asosiasaun HAK Neves sai nudar treinador iha area Lei Direitus Humanus ba ofisiais Polisia Nasional Timor-Leste, ba membru Guvernu Timor-Leste, lideransa lokal sira, ba staf no membru Organizasaun Juventude no ONG (feto-mane). Kumesa tinan 2006 to'o agora, Neves sai treinador ba area Transformasaun Konflitu & Harii Paz ba lideransa no elementu organizasaun Juventude, Artes no Ritual Marsiais, lideransa lokal, ONG no seluk-seluk tan;

Iha 2009-2010: Neves sai nudar mentor ba Programa Prevensaun Konfliktu Komunitaria iha Dirasaun Nasional Prevensaun Konfliktu Komunitaria iha Sekretaria Estado Asunto Seguransa (SES). Neves hola konsentrasaun ne'e hodi atende kursu nivel Universitariu iha area Aplikasaun Transformasaun Konfliktu & Estudu Paz nian iha Pannasastra Internasional School-University of Cambodia hahu iha setembru 2007 to'o Abril 2008. Neves mos, atende kursu no konferensia lubun ida hamutuk ho rede hari'i paz nian iha reziaun Azia "ACTION ASIA" kumesa tinan 2007 to'o agora;

Hamutuk ho ACTION ASIA, Neves tuir kursu oin-oin iha area refere, nune mos halo apresentasaun lubun ida konaba esperiensia no politika hari'i paz iha Timor-Leste. Agora Neves, ativu halo estudu independenti ba isue-sira konaba konfliktu tematiku hodi haforsa materia hanorin iha Departamentu Dezenvolvimentu Komunitariu-Universidade Nasional Timor-Lorosa'e (UNTL) no estado konaba materia sira hodi hanorin ba organizaun sosiedade sivil no entidade estado nian hanesan ba Polisia Nasional Timor-Leste (PNTL) espesifiku liu konaba Polisiamentu Komunitariu;

Hahu fulan Outobru 2009, Neves foti kursu Master by Research iha area Estudu Paz & Transformasaun Konfliktu iha Faculdade Teolojia, Universidadi Kristaun Duta Wacana (UKDW) Jogjakarta, Indonesia. Iha Abril 2010, Neves sertifikadu nudar Profesor Bainaka (Visiting Professor) ba Fakultadi Paz, Rekonsiliaun & Violensia-Laek iha The Pan Africa of Peace University iha nasaun Demokrsia Republika Kongo (DRC);